

AKASHVANI AIZAWL  
REGIONAL NEWS BULLETIN  
HEADLINES (EVENING)

Date – 01/05/2026

Time - 18:30 -18:40Hrs

- April ni 27 atanga ni 3 chhung vel ruah leh thlipui thawk khan Mizoram pumah chenna in 175 aia tlem lo leh sorkar, kohhran leh vantlang in 20 dawn lai a tichhia.
- Lunglei District Jail a tang mi 16, Gauhati High Court Aizawl Bench thupek lem hmanga chhuahtir-te zinga 3 te chu Police-in an zawng mek.
- Vawiin Buddha Purnima pualin Union Home Minister Amit Shah-a chuan Sacred Holy Relics Exposition of Tathagata Buddha a tlangzarh
- Vawiin atangin Commercial LPG Cylinder kg.19 man chu cheng 993 a tihsan a ni.

<><><>

DISASTER

April ni 27 atanga ni 3 chhung vel ruah leh thlipui thawk khan Mizoram pumah chenna in 175 aia tlem lo leh sorkar, kohhran leh vantlang in 20 dawn lai a tichhia.

Disaster Management & Rehabilitation department sawi danin ruah sur nasa leh thlipui thawk hian Lunglei district-ah chhiatna a thlen nasa ber a, Lawngtlai leh Serchhip district bakah Kolasib district pawh a tuar nasa an ni. Chenna in, sorkar kohhran leh vantlang in a tihchhiat bakah hian hmun engemawzatah leimin leh lung tla avanga kawng ping a awm a. Electric ban tlu leh electric sem chhuahna hru chhia a tam avangin hmun tam takah kawlpheha a chatlak phah a. Aizawl khawpui chawmtu Tlawng lui a nut lutuk avangin tui sem chawlh san a ni a. Aizawl district-ah ruah a sur nasat avangin ni hnih a zawnin sikul chawlh puan a ni a, district dangah pawh sikul an chawl bawk.

Indian Meteorology Department hnuai a Aizawl Meteorological Centre chuan vawiin hian Mamit, Kolasib, Aizawl leh Saitual-ah te ruah tam vak lo sur turin a hrilh lawk a, thli darkar khata km 40 leh 50 inkara chaka tleh thei a nih thu an sawi bawk a ni.

<><><>

RELIEF

Vawiin khan Chief Minister Pu Lalduhoma chuan a bial, Thenzawl khawchhunga thlipui leh ruahpui avanga chhiat tawkte hnenah SDRF leh CM Relief Fund atangin zangnadawmna a hlan a, Thenzawl kanan veng leh Tualvungi veng a chhiat tawkte chu a hmunah a tlawh nghal bawk.

April ni 27, Thawhtanni tlaia thlipui leh ruahpui vanawn sur khan Thenzawl-a chenna in 8 chu luah tlak lohvin a len chhia a, heng bakah hian in chhe nasa zual 9 awmin, chhe nasa lutuk lo 54, sawrkar in leh vantlang in chhia 13 leh electric ban tlu 15 a awm a ni.

<><><>

ANIMAL INSURANCE

Ran vulhtuten an ran vulhte an thih palh pawha sum an hmuh theihna tura Mizoram sorkarin National Insurance Company (NIC) thawhpuaia 'Animal Insurance' a kalpui mekah nimin thleng khan vawk 667 insurance tih a ni tawh a, ran dang - bawng, sial, beram leh kel vulhtu zingah insurance ti an la awm lo.

NIC hotute hnen atanga Akashvani News Aizawl thudawn danin, Aizawl district-ah vawk insurance tihsak 371 awm tawhin a tam ber a; Siaha, Serchhip leh Saitual district-ah insurance ti an la awm lo a ni.

Insurance tih man hi a tira sorkar nena inremnaah chuan GST chawi ngai tura ngaih a nih avangin GST chhût tel a ni a, amaherawhchu central scheme-ah GST chawi a lo ngaih leh si loh avangin ran insurance tih man hi a tlawm ta zawk niin NIC hotute chuan an sawi a, vawkah pawh a tirah insurance tihna man tur hi GST chhût telin vawk pakhtah Rs 292 an chawi tur angin puan a ni a, MoU-ah pawh ziah lan a ni. Mahse, central scheme-ah GST chawi a lo ngaih leh si loh avangin vawk vulhtute hian Rs 248 chauh an chawi a ngai, an ti.

NIC hotute chuan ran insurance hi vawk bakah bawng, sial, beram leh kel-ahte tih theih ni mah se nimin thleng khan vawk vulhtute chiahin an vawk vulhte an insure thu an sawi a; vawk vulhtute zingah pawh hrileng a awm rih loh avanga insurance tih kher ngai ti lo engemaw zat an awm thu an sawi bawk.

<><><>

#### PRISONERS

Lunglei District Jail a tang mi 16, Gauhati High Court Aizawl Bench thupek lem hmanga chhuahtir-te zinga 3 te chu Police-in an zawng mek.

Lunglei district SP Pu Jerome Lalmuankima hnen atanga Akashvani News thu dawn danin mi mi 16 chhuahte zinga pakhat hi a thi a, a dang mi 12-te chu man an ni leh tawh a, mi 3-te man leh tura ngawrh taka hma lak mek a ni. Lunglei District Jail a tang mi 16-te hi Gauhati High Court Aizawl Bench-a Registrar leh Asst. Registrar te'n chhuah tura thupek an siam anga lehkha lem siam chawpin Jail thuneitute'n an lo chhuah a. Tang chhuahte hi ruihhlo kaihnawihha Narcotic Drugs & Psychotropic Substances Act, 1985 leh Protection of Children from Sexual Offences (POCSO) Act, 2012 bakah IPC/BNS hmanga an chungthu ngaihtuah laite leh thiam loh chantir tawhte an ni. Hemi chungchangah hian Police chuan tuna Lunglei District Jail-a tang mek Jeremiah Lalthangtura (22) chu lehkha lem siamtu ngei ni a an rin thu an sawi a. Amah hi thubuai 8 lai awrh mek a ni a, a thubuai neih zingah hian cheque lem siam, mi bum leh online hmanga mi sum chhuhsakte a tel a ni.

Tang chhuah takte chhuahtir tur lehkha lem siam hi a tak a ang hle tih District Jail thuneitute chuan an sawi a ni. Jail pawn lamah thurualpui nei lo chuan a tih theih an rin loh thu an sawi a. Computer thiam tak leh Court kalphung pawh hre tak intiam rualte thiltih ni ngei a a lan thu an sawi bawk a ni.

He tih lai hian Jeremy Thangtura hi thu zawhfiah atan Police ten darkar 72 chhung kawl an dilna chu Lunglei Dist Court chuan vawiin khan a phalsak a. Vawiin lam khan Police Station ah thu zawhfiah a ni a, a tul angin an dawp chho zel dawn tih niin an sawi. Tutu nge inhnawih tih leh thil tul dang te zawt chhuakin thuchhuah mumal tak siam thuai an inbeisei tih media te an hrilh a ni.

<><><>

#### MUHCS

Mizoram sorkar chuan tun sorkar kum kal mek 2026-27 atana Mizoram Universal Healthcare Scheme (MUHCS) 2.0 a kalpui hnuah nimin thleng khan damlo 2,615 enkawlina senso atan cheng nuai 700 a pechhuak tawh.

Mizoram State Healthcare Society hotute chuan Akashvani News Aizawl zawhna chhangin, sorkar kum kal mekah MUHCS 2.0-ah hian MUHCS kalpuitu damdawi-inte hnenah damlo an enkawlna senso rulh nan cheng nuai 700 an pek chhuah tawh thu leh hei hi damlo 2,615 enkawlna senso a nih thu an sawi a; thla hmasa chung khan damlo enkawlna pawisa hi tum 2 pekchhuah niin, kar hmasa khan cheng nuai 400 leh nimin khan cheng nuai 300 an pechhuak a ni.

Healthcare Society hotute chuan damlo bill an dawn reng thu leh a tahtawl tē tēin pawisa an pek chhuah zel thu an sawi a, damdawi-inite hnena damlo enkawlna senso pe turin an inbuatsaih leh mek thu leh karleh lamah pawh khian an pek chhuah leh dawn thu an sawi.

Tun dinhmunah MUHCS 2.0-ah hian vawiin thlengin pawisa senga inziaklut chhungkua 37,851 an awm tawh a. MUHCS 1.0 ah khan chhungkaw inziaklut 20,213 an awm a, a punna chu chhungkaw 17,638 niin za zela 87 point 26 zet a ni. Sorkarin April ni 28 khan MUHCS hmangtu damdawi-in te hnenah cheng vaibelchhe 3 leh nuai 99 chuang a pe chhuak a, nimin khan cheng vaibelchhe 3 chuang a pe chhuak leh bawk.

MUHCS 2.0-ah hian inziahlul theih hun hi tun thla ni 15 thleng hawn niin, online hmangin [muhcs.mizoram.gov.in](http://muhcs.mizoram.gov.in) ah inziahlul theih a ni a; sorkar hnathawkte, pensioner-te leh golden card neite chu inziahlul a ngai ve lo.

<><><>

#### CONGRESS

All India Congress Committee (AICC) National Spokesperson Pi Ritu Choudhary chuan vawiin khan Aizawl Press Club-ah thuthar thehdarhtute a kawm a; AICC chuan rampum huapa spokesperson, research coordinator leh publicity coordinator tur zawna 'National Talent Hunt' an buatsaih dawn thu sawin, tel theuh turin Mizo thalaite a sawm.

Pi Ritu Choudhary chuan India rama mipui rorelna (democracy) leh ram danpui lalnate chu tun dinhmunah rahbehin a awm mek niin a sawi a. Rahul Gandhi leh Pawan Khera te pawhin harsatna tam tak an tawh phah mek a, Constitution-in zalen taka ngaihdan sawi theihna mitin a pek hi humhim turin Congress Party chuan hma a la chho zel dawn a ni a ti a. Tunah hian state tinah Congress party chuan democracy chawinun na'n National Talent Hunt buatsaihin, national level-a spokesperson, research coordinator leh publicity coordinator tur a zawng dawn, a ti.

Mizoram thalaite pawh National Talent Hunt-ah hian tel theuh turin Pi Ritu Choudhary chuan a sawm a, talent hunt kaltlanga thlanchhuah thalaite tan AICC chuan national level platform pe-in, mipui leh ram inrelbawl dan inkara democracy a nun chhoh zel theih nan auchhuahna hun pek an nih dawn thu a sawi bawk.

<><><>

#### MADC VC RESULTS

Siaha district chhunga VC 6 by-election-ah BJP-in seat 4 an la a, independent-in seat 2 la-in ZPM-in seat khat an la.

Nimin khan Siaha District chhunga VC 6-a by-election vote, vote tla te chhiar chhunzawm nghal a. BJP chuan Noaotla -3, College Vaih-2, Meisavaih 'East' khat

leh Khaikhy seat an la a. Meisavaih East seat 1 dang chu ZPM-in an la thung a. Independent-in seat an lakte chu Thosai leh Tipa-5 te a ni a. Independent candidate te hi ZMP, INC leh MNF in an thlawpte an ni.

<><><>

#### COVID-19

Kumin chhungin Mizoramah Covid-19 hri kai mi 43 an awm leh tawh a, tuna enkawl mek mi 13 an ni.

Health & Family Welfare department hnuai a Integrated Disease Surveillance Programme (IDSP) hotute hnen atanga thu dawn danin vawiinah Covid-19 hri kai leh kai lo endik mi 8 zinga 5 chuan an kai tih hmuhchhuah a ni a. Nimin khan Hri kai mek 11 zinga pakhat dam taka chhuah hnu a vawiina mi 2 dang an chhuah leh hnu-in hri kai mek 13 an awm mek a ni. Covid-19 hri kai hi an awm chhoh leh tak avangin sorkar chuan mitin fimkhur turin a chah a. Covid-19 hi a la reh lo a, a khat tâwka rawn lanchhuah veleh chang a nei thin an ti.

Kum 2020 bul lama Covid-19 hri lengin Mizoram a rawn thlen ve atanga vawiin thleng hian hri kai leh kai lo mi nuai 19, sing 9, sang 8 leh 462 endik an ni tawh a, an zinga mi nuai 2, sing 3, sang 9 leh 718 chuan hri an kai tih hmuhchhuah a ni a. Hri kai zinga mi nuai 2, sing 3, sang 8 leh 971 chu enkawl dam an ni a. Covid-19 avang hian Mizoramah mi 734 an thi a ni.

<><><>

#### AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

#### BUDDHA RELICS

Vawiin Buddha Purnima pualin Union Home Minister Amit Shah-a chuan Sacred Holy Relics Exposition of Tathagata Buddha chu Leh-a Jivatsal ah a tlangzarh. Ladakh mipuite Buddha Purnima chibai bukin Pu Shaha chuan kum 75 hnuah he thil hlu hian Ladakh a lo thleng leh ta a ti a. Lord Buddha finna leh zirtirna chu kum 2500 hnuah pawh ala pawimawh reng a ti a. Buddha zuitu Ladakh leh Kargil ami te chauh niloin hmundanga sakhaw dang betute pawhin he Lord Buddha lim thianghlim avang hian chakna thar an nei ang a ti bawk.

<><><>

#### LPG

Vawiin atangin Commercial LPG Cylinder kg.19 man chu cheng 993 a tihsan a ni. Delhi ah chuan LPG bur khat hi cheng 3071 leh duli ah a kai chho a. Hetihlai hian Domestic LPG cylinder man erawh thlak danglam ala ni lo thung. Kan Correspondent sawidanin thlatin tuialhthei company ten tuialhthei leh gas mante hi an ennawn thin a. Hemi hnu hian a man tihsan thin a ni a. Tun dinhmunah petrol leh diesel man tihsan ala ni lo bawk a ni.

<><><>